



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 254, Datë 07.10.2022

MBI

**NJË NDRYSHIM NË VENDIMIN NR. 242, DATË 23.09.2022, TË BORDIT TË ERE-S
MBI KËRKESËN E SHOQËRISË FSHU SH.A., LIDHUR ME KOSTOT QË DUHET TË
PËRFSHIHEN NË LLOGARITJEN E ÇMIMIT ME PAKICË TË ENERGJISË PËR
KLIENTËT FAMILJARË ME KONSUM MBI 800 KWH NË MUAJ**

Në mbështetje të neneve 1, 83, 85, pika 1 dhe 2, 90 të ligjit nr. 43/2015 “Për sektorin e energjisë elektrike”, i ndryshuar; nenit 12, nenit 105 gërma “c”, të Kodit të Procedurave Administrative të Republikës së Shqipërisë; Vendimit të Këshillit të Ministrave (VKM) nr. 584, datë 08.10.2021 “Për shpalljen e gjendjes së emergjencës në furnizimin me energji elektrike”, i ndryshuar; VKM-së nr. 456, datë 29.06.2022 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”; nenit 7, germa “g” e “Metodologjisë së Përcaktimit të Çmimeve për Shitjen e Energjisë Elektrike me Pakicë tek Klientët Fundorë që Furnizohen nga Furnizuesi i Shërbimit Universal (FSHU)”, miratuar me vendimin e bordit të Entit Rregullator të Energjisë (ERE) nr.189, datë 23.11.2017 dhe nenit 15 të Rregullores për organizimin, funksionimin dhe procedurat e ERE-s, miratuar me vendim të bordit të ERE-s nr. 96, datë 17.06.2016; bordi i ERE-s, në mbledhjen e tij të datës 07.10.2022, mbasi shqyrtoi relacionin me nr. 1773 prot., datë 06.10.2022, të përgatitur nga Drejtoritë Teknike “Mbi një ndryshim në vendimin nr. 242, datë 23.09.2022, të bordit të ERE-s, “Mbi kërkesën e shoqërisë FSHU sh.a. lidhur me kostot që duhet të përfshihen në llogaritjen e çmimit me pakicë të energjisë për klientët familjarë me konsum mbi 800 kWh në muaj”,

Konstatoi se:

- Korporata Elektroenergjitike Shqiptare (KESH) sh.a., i ka dërguar Shoqërisë Furnizuesi i Shërbimit Universal (FSHU) sh.a. dhe ERE-s shkresën me nr. 4820/6 prot., datë 05.10.2022 me anë të së cilës ka bashkëlidhur vendimin nr. 10, datë 04.10.2022 të Këshillit Mbikëqyrës të KESH sh.a., “Për pezullimin e aplikimit të tarifave të shitjes së energjisë elektrike për FSHU sh.a. për muajin tetor 2022” dhe Vendimin nr. 6490/5 prot., datë 05.10.2022 të Asamblesë së Përgjithshme të Aksionarit “Për pezullimin e aplikimit të tarifave të shitjes së energjisë elektrike për FSHU sh.a., për muajin tetor 2022”, si dhe relacionin shpjegues mbi të cilin janë mbështetur këto vendime.

- Me datë 6.10.2022, ERE u njoh me Vendimi nr. 6490/5 prot., datë 05.10.2022, të Asamblesë së Përgjithshme të Aksionarit nga cili rezulton ndryshimin e çmimit të shitjes së energjisë elektrike për FSHU sh.a.
- Bazuar në nenin 5, pika 2 të VKM-së nr. 456, datë 29.06.2022 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike” nder te tjera përcakton se: “..... *Shoqëria publike e prodhimit, e ngarkuar me detyrimin e shërbimit publik, furnizon Furnizuesin e Shërbimit Universal me të gjithë sasinë e nevojshme, për furnizimin e klientëve universalë, sipas çmimit për njësi të energjisë elektrike, të miratuar nga Asambleja e Përgjithshme e Shoqërisë*”.
- Gjithashtu neni 4, pika 7 e VKM-së nr. 456, datë 29.06.2022, përcaktohet se: “Ky vendim është i zbatueshëm edhe për përballimin e situatës së gjendjes së emergjencës në furnizimin me energji elektrike, sipas nenit 90 të ligjit nr. 43/2015, “Për sektorin e energjisë elektrike”. Në vijim, shoqëria KESH sh.a., ka vendosur tarifimin për shitjen e energjisë elektrike për muajin tetor 2022 sipas tabelës më poshtë:

Energji e shitur për konsum klientë familjar në TU	2.6 ALL/KWh
Energji e shitur për konsum klientë jo familjar në TU	2.6 ALL/KWh
Energji e shitur për konsum klientë në Tension të mesëm TM, 6/10/20 KV	12 ALL/KWh

- Ndër të tjera në relacionin shpjegues të KESH sh.a., mbi të cilin janë mbështetur vendimet e Këshillit Mbikëqyrës dhe Asamblesë së Përgjithshme të Aksionarit të KESH sh.a., deklarohet se përmirësimi i situatës hidrologjike në kaskadën e lumit Drin si dhe rënia konsumit të energjisë elektrike të klientëve të cilët shërbehen nga FSHU sh.a., ka bërë të mundur mos ekspozimin e KESH sh.a., në blerjen e energjisë elektrike në tregun e lirë.
- KESH sh.a., deklarohet se situata financiare e shoqërisë për periudhën deri në fund të muajit tetor 2022, bën të mundur përballimin e nevojës për energji të FSHU sh.a., energji e cila do të ofrohet nga KESH sh.a., në zbatim të detyrimit të shërbimit publik.
- Shoqëria KESH sh.a., deklarohet se prodhimi nga kaskada do të destinohet vetëm për mbulimin e konsumit të klientëve në TU, familjar, biznese në TU dhe klientë që furnizohen në TM në regjimin e FM niveli i tensionit 6/10/20 kV, çmimi i të cilëve është i mbrojtur.
- Shoqëria deklarohet se në kuadër të përditësimit periodik të situatës hidrike dhe aktivitetit, do të përditësojë brenda datës 25 tetor 2022 Këshillin Mbikëqyrës dhe Asamblesën e Aksionarëve për të dhënat financiare dhe energjitike, me qëllimin e paraqitjes së situatës dhe marrjen e vendimeve të nevojshme për aplikimin e tarifimeve.
- Meqenëse me Vendimin nr. 6490/5 prot., datë 05.10.2022 të Asamblesë së Përgjithshme të Aksionarit çmimi i miratuar prej 2.6 lekë/kWh për klientët familjarë dhe jo familjarë në TU është i njëjtë me çmimin e njohur nga ERE në përlllogaritjen e kostove të blerjes së energjisë elektrike të FSHU sh.a., shprehur dhe në vendimin nr. 74, datë 13.04.2022 “Mbi vlerësimet e

ERE për kostot e aktivitetit të furnizuesit të shërbimit universal për periudhën 01.05.2022 – 31.12.2022” të bordit të ERE, vlerësohet se për muajin tetor 2022, çmimet e shitjes së energjisë elektrike për klientët që furnizohen në kushtet e shërbimit universal nga FSHU sh.a., për muajin tetor 2022 të vijojnë të jenë ato të miratuara në vendimin nr. 74/2022 të bordit të ERE.

- Bazuar në përmirësimin e treguesve tekniko ekonomik sikurse ndodhur së fundmi për muajin tetor 2022, në rastin se kosto e blerjes së energjisë elektrike të FSHU sh.a., në zbatim të VKM-së nr. 456/2022 do të vijojnë të jenë ato të miratuara nga Asambleja e Përgjithshme e Aksionarit të KESH sh.a., prej 2.6 lekë/kWh për të gjithë konsumatorët të cilët shërbehen në kushtet e shërbimit universal të furnizimit.
- Në këto rrethana ERE do të vijojë me ndryshimet përkatëse në vendimit nr. 242, datë 23.09.2022, “Mbi kërkesën e shoqërisë FSHU sh.a., lidhur me kostot që duhet të përfshihen në llogaritjen e çmimit me pakicë të energjisë për klientët familjarë me konsum mbi 800 kWh në muaj”, duke lënë në fuqi çmimet e shitjes me pakicë të energjisë elektrike të miratuara me anë të vendimit nr. 74/2022 të bordit të ERE nëse do ketë ndryshime të theksuara.

Për gjithë sa më sipër, bordi i ERE-s,

Vendosi:

1. Të miratojë ndryshimin e pikës 1 të vendimit nr. 242, datë 23.09.2022 si më poshtë:
 - *“Miratimin e çmimit të shitjes së energjisë elektrike prej 42 lekë/kWh për konsumin mbi 800 kWh/muaj për klientët familjar për periudhën 1 Nëntor – 31 Dhjetor 2022.”*
2. Lënien në fuqi të çmimeve të shitjes me pakicë të energjisë elektrike të FSHU sh.a., për konsumatorët familjarë, të miratuara me anë të vendimit të bordit të ERE-s nr. 74, datë 13.04.2022, për muajin Tetor 2022.
3. Drejtoria Juridike dhe e Zgjidhjes së Mosmarrëveshjeve të njoftojë FSHU sh.a., dhe palët e interesit për vendimin e bordit të ERE-s.

Ky vendim hyn në fuqi menjëherë dhe i shtrin efektet nga data 1 Tetor 2022.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI